

Awe WEB Aruba ta conmemora 85 aña di existencia



ORANJESTAD – WEB Aruba ta di fiesta. Awe 22 di juni e compania di awa y energia ta conmemora oficialmente e hecho cu 85 aña pasa a cuminsa desalina awa na Aruba; y tambe cu 25 aña WEB a bira un NV.

“Durante 85 aña nos a haya nos ta adapta constantemente na cambionan. Mayoria cambio drastico na WEB a tuma luga den e ultimo 10 pa 15 añanan. Na mes momento desaroyo ta muestra cu innovacion y desaroyo lo acelera ainda mas lihe. Mas bien ta papia di añanan en bes di decadanan”, asina director general di WEB, Luis Oduber a bisa durante un conferencia di prensa ayera.

Hunto cu director financiero di WEB, Randolph Ruiz, el a refleha riba e logronan riba tereno di desaliniacion di awa y generacion di energia durante 85 aña. WEB lo celebra

e aniversario cu comunidad, pagando e cuenta di awa 85 cliente cada luna pa e proximo seis lunanan. Tambe lo inicia un campaña pa colecta recuerdonan di WEB cual lo resulta eventualmente den un tesoro di recuerdo di 85 aña.

Celebracion cu comunidad

E aniversario di 85 aña no solamente ta pa refleha, sino tambe pa celebra y conmemora. Hefe di Servicio na Cliente na WEB, sra. Jennai Chin a lansa e campaña di celebracion. E campaña ta encera cu tur luna 85 cas tin chens di ricibi un cuenta di awa cu ta paga caba door di WEB.

Participacion ta hopi facil. E cliente no mester haci nada. Su number di parcela ta su number di lot. Ganadonan di luna, lo nota cu e saldo di nan cuenta di awa pa e luna concerni ta 0,00 florin. E

campana ta conta pa e cuantenan di awa di mei te cu october 2017. Tur luna di nobo lo tin 85 ganado entre tur cliente residencial; pues al final lo tin un total di 510 ganado. Nan clientenan mester keda pendiente y check bo cuenta di awa asina cu e yega den brievebus.

Conmemoracion

Relacionista Publico di WEB, sra. Asja Dongen finalmente a bisa cu ta hopi importante pa conmemora e aniversario di 85 aña tambe. El a anuncia cu lo haci e conmemoracion den un forma innovativo. ‘Pronto nos lo lansa nos campana ‘Mi tesoro di WEB’, caminda nos lo pidi empleadonan, pensionadonan di WEB of nan familia, personanan cu a yega di traha hunto cu WEB den un of otro proyecto, tur pa upload riba webaruba.com, cualke potret, storia of video di cual nan tin un recuerdo di WEB, di historia di desaliniacion di awa of di produccion di energia.’ Pronto WEB lo comunica con esaki ta bay, pero ta pidi for di awor pa cuminsa colecta ‘e recuerdonan’.

Un tiki di historia

Riba 22 di juni 1932, LandsWaterVoorziening oficialmente a pone den operacion e prome planta di awa cu un capacidad di 200 meter cubico pa dia, mas 2 tanki di reseva na Balashi. Awendia nos plantanan di awa tin un capacidad di 44000 meter cu-



bico pa dia y nos tin 6 tanki di reseva di awa riba tereno di WEB y 7 rond di nos isla. Dia 22 di juni ta conmemora tambe cu 59 aña pasa Aruba su Water- en Energiebedrijf a produci e prome megawattnan pa e isla y awendia ta produci un averahe maximo di 135 Megawatt pa dia.

Durante e 85 añanan di desaliniacion di awa, a pasa den hopi cambio. Despues di e traspaso di Landswater-voorzieningsdienst, LWVD, na 1956 den WaterVoorzieningsDienst, WVD, cu tawata departamentonan di gobierno di Aruba y e construccion di un planta nobo na 1958, a keda inverti placa den unidatnan nobo pa hisa e capacidad di produccion di awa y

coriente.

Den e periodo despues te cu 1984 a cambia pa e tecnologia di vaporacion Multi Stage Flash y na aña 2008 a introduci e tecnica mas eficiente, esta SeaWater Reverse Osmosis. Riba tereno di energia, WEB no a keda atras. Na 1958 a inicia e produccion segun e sistema integra di boiler y turbina di vapor. Mientrastanto a bin cambio den e status huridico di e compania. Na 1961 Water-voorzieningsdienst a bira Water- en Energiebedrijf (WEB) y na 1992 Gobierno di Aruba a privatiza e servicio den WEB Aruba NV cu Gobierno di Aruba como unico accionista.

Gradicimento